

# Dal Crap Ses al chastè da Riom – las vischnancas a l'entrada dal Surses

■ En il sid da Casti sa chatta il Crap Ses che furma il cunfin tranter la Val d'Alvra ed il Surses. Il LIR fa oz staziun en las vischnancas situadas a l'entrada dal Surses: Cunter a la via da transit sco er Salouf e Riom-Paronz situadas sin la spunda da vart sanestra da la val.

## Burvagn

Fraziun da la vischnanca politica da Cunter (Surmeir), situada a la via dal Güglia a l'entrada en il Surses. 1375 *Prauwein*, 1452 *Bruweyn*. Fin enturn il 1950 era Burvagn ina culegna purila cun ustaria, dapi il 1990 existan qua mo pli abitaziuns da vacanzas (duas abitaziuns per ils administraturs). Il 1786 ha il viturin Dosch chattà en in er a Burvagn in grond stgazi d'aur e d'argient dal temp roman cun bratschlets, fiblas, stgatlis da parfum e munaidas romanas e gallicas ch'el ha vendì ad in aurer a Clavenna; insaquants da quests chats èn exponids en il Museum retic a Cuira ed en il Museum nazional a Turitg. Il 1583 è documentada la chaplutta da S. Valentin, reconstruida il 1662 tras ils chaputschins en stil baroc. La Villa Travers dal 17avel tschientaner renvescha als lioms da parentella da questa famiglia engiadinaisa cun il Surses. A Vaznoz a Burvagn han ins scuvert il 1830 restanzas da la furtga, utilisada da la dretgira criminala dal Surses, sco era fastiz d'ina chaltschiner.

Gion Peder Thöni

## Cunter

Vischnanca politica, circol Surses, district Alvra, situada a la via dal Güglia sin ina bova interglaziala a l'ost da la Gelgia, cun l'acclau da Burvagn e las acclas da Promastgel e Muntschect. 1370 *Contra*, tudestg Conters im Oberhalbstein (fin il 1943). 1850 182 abitants; 1900 152; 1950 152; 1970 116; 2000 212. Culegna dal temp da bronz (12avel tschientaner a.C.) a Caschligns sur Cunter, probablmain emprima colliaziun cun la Val d'Alvra. Part da la dretgira auta dal Surses entaifer la Lia da la Chadé fin il 1850; ils uffizis da quella dretgira eran savens occupads da members da la famiglia Scarpatetti, ina da las familias dominantas da la val. Ina baselgia è menziunada per l'emprima giada il 1392; la baselgia nova, construïda en stil baroc, è vegnida consecrada a s. Carlo Borromeo il 1677.



Ils vitgs da Riom e Paronz.

FOTO J. MENOLFI

Ils chaputschins han pastorà Cunter davent da Riom 1638–1725. La vischnanca da Cunter, incorporada oriundamain a quella da Riom, è sa fatga politicamain ed economicamain independenta en in process pli lung ch'ha durà dal 17avel fin l'entschatta dal 20avel tschientaner. Il 1566 ha il Surses sustegnì en ina tschentada extraordinaria, salvada a Cunter, la pretensiun da la Lia da la Chadé da destituir l'uvestg da Cuira Beatus a Porta. Il 1740 han ils da Cunter gidà recruts austriacs desertants a fugir; l'Austria ha sin quai scumandà da furnir granezza a las Trais Lias. Ils incendis dal 1754, 1812, 1824 e 1896 (incendiament) han destrui quasi tut ils edifizis pli vegls. Fin il 1950 era Cunter ina vischnanca da purs, a la fin dal 20avel tschientaner quintava ella anc nov bains purils ed insaquants paucas interpresas da mastergnanza. Atgna scola primara dapi ca. il 1845, pli tard consorzi da scola cun vischnancas vischinas. Dapi il 1970 effectuescha il svilup turistic a Suagnign la construcziun da chasas e d'abitaziuns da vacanzas a Cunter che contribueschan, ensemen cun ils

fits d'aua da las Ovras electricas Turitg e da l'implant da gera a la Gelgia, a la buna situaziun finanziata da la vischnanca. Part da la populaziun da lingua rumantscha: 1980 75 % (lingua materna); 2000 51 % / 64,1 % (meglra lingua / tuttas indicaziuns).

Gion Peder Thöni

## Salouf

Vischnanca politica, circol Surses, district Alvra, situada da la vart sanestra dal Surses, cun las culegnas Mulegn e Del. 1160 *Salugo*, tudestg Salux (fin il 1943). 1850 413 abitants; 1900 287; 1950 289; 2000 205. Colonia dal temp da bronz sin la Motta Vallac. Salouf sa chattava a la ruta dal Set en il temp roman ed en il temp medieval tempriv. Il 1160 è documentà il chavalier de Salugo che administrava il bain central episcopal, suandà da la famiglia Fontana oriunda da Salouf. Dapi il temp medieval era Salouf il lieu da cumin. La vischnanca è restada fidaivla a la cretta catolica. Il 1290 è attestada l'emprima baselgia romanica (S. Gieri), reconstruida parzialmain enturn il 1500 (arvieu a rait ed altar cun alas dal 1502). Tranter il 1637 ed il 1947 han chaputschins provedi la plaiv. Dapi il 1580 custodiescha il plevon da Salouf la baselgia da pelegrinadi a Ziteil (2434 m).

A Del (maïaria da la vischnanca) ha il landfoct Caspar Frisch legà il 1595 la chaplutta da S. Roc che posseda maletgs remartgabels dals apostels. A Mulegn sa chatta il davos mulin bain mantegnì. Dal 1828 fin il 1847 (incendi) èn stadas en funcziun fundarias ed ina fravgia cun martels a Flex a la Gelgia. Il 1972 han fusiunà las classas superiuras da la scola primara da Salouf cun quellas da Mon e Stierva (consorzi da scola). La meglieraziun generala (1969–80) ha pudì franar in pau la depopulaziun. A l'entschatta dal 21avel tschientaner era l'agricultura betg pli il sectur d'acquist dominant (oravant tut allevament da muvel e cultura da graun da pavlar). Cun sia colonia da chasas da vacanzas (cun participaziun dals abitants a las aczias) s'orientescha Salouf fermamain al center turistic da Suagnign. Part da la populaziun da lingua rumantscha: 2000 77,6 % / 86,3 % (meglra lingua / tuttas indicaziuns).

Gion Peder Thöni

## Riom

Anteriura vischnanca politica, circol Surses, district Alvra, situada a la via veglia per il Pass dal Güglia, fusiunada il 1979 cun Paronz a la vischnanca politica da Riom-Paronz. 841 *Villa Riamio*,

tudestg Reams (istoric). 1850 294 abitants, 1900 221; 1950 230; 1970 207.

## Temp roman

Durant la construcziun dal stradun chantunal il 1974–75 èn vegnids scuverts mirs romans al pe dal vitg. Las exchavaziuns, exequidas dal Servetsch archeologic dal Grischun en ils onns 1979–83, han purtà a la glich numerusas restanzas d'edifizis romans, tranter ils quals in grond edifiz da ca. 30 x 20 m che serviva probablmain da *mutatio* (albiert e stallas). A l'intern da l'edifiz èn vegnidas scuvertas pliras stanzas stgaulas, impurtantas picturas muralas (maletgs dad amors), in palantschieu d'aissas arsas e chavas da fravgia. En pli èn documentads plirs edifizis annexs, tranter quels dus cun stgaulament da palantschieu (ipocaustic), ina furnaria e pliras chasas da lain cun fuainas. L'ospizi sa chattava a la via romana charrabla sur il Güglia. Bliers chats cumprovan in commerzi intensiv sin quest traject. La culegna romana da Riom è vegnida utilisada dal prim tschientaner tempriv fin al 4avel tschientaner s.C. Pliras chamonas simplas da lain cun fuaina documenteschan ina colonisaziun cuntinuanta fin viaden il 7avel tschientaner.

Jürg Rageth

## Temp medieval e temp modern

En l'«Urbari curretic dals bains imperials» (ca. 840) cumpara Riom sco bain roial privat e sco center administrativ, ina funcziun che la culegna ha occupà era dal 1258 fin il 1552 entaifer il signuradi episcopal dal Surses. Ultra da quai era Riom probablmain la pli veglia plaiv ed aveva la pli veglia baselgia da batten da la val. La baselgia gotica, construïda il 1461 e deditgada a s. Luregn, è vegnida remplazzada il 1677 d'in edifiz erigi da chaputschins. Dal 1641 fin il 1726 han appartegnì era Paronz e Cunter a la plaiv da Riom. En il temp autmedieval han ils administraturs roials von Wangen, derivants da Balsaun, construì il chastè da *Raetia Ampla* (l'edifiz odiern datescha dal 13avel tschientaner) ch'è passà gia il 1258 cun tut ils bains a l'uvestgieu da Cuira. Durant il domini episcopal fin il 1552 è stà Riom sedia dals landfocts da l'uvestgieu, alura fin ca. l'onn 1780 da quels da la dretgira criminala dal cumin dal Surses entaifer la Lia da la Chadé. Ils landfocts derivavan solitamain da familias dominantas indigenas (Marmels, Fontana, Frisch, Scarpatetti). A partir dal 16avel tschientaner n'è il chastè betg pli stà abità, el ha dentant servì da lieu

da cumin fin en il 18avel tschientaner. In gudogn supplementar als purs ha purtà dal 14avel tschientaner fin il 1850 il trafic da transit sin la Via Sura (Güglia/Set) ed il transport da metal da la Val Schmorras, in bratsch lateral da la Val Nandro, a la fundaria da Flex, per la quala ins ha smers grondas parts dals guauds communalis. Il 1864 ha in incendi destrui quasi l'entir vitg da Riom. Dals rund 75 bains purils d'antruras existan oz anc bundant duas dunsainas che pon profitar da la meglieraziun generala dal 1958–89 (ensemen cun Paronz). La Val Nandro vegn utilisada da la corporaziun d'alp che cumpiglia Riom, Paronz, Cunter e Suagnign. Grazia al turissem da Suagnign è sa transformà Riom dapi il 1950 ad in lieu da vacanzas. 95 % da las pistas avertas tras las telefericas da Suagnign sco era la gronda colonia da vacanzas da Tignes sa chattan sin il territori da Riom. La vischnanca da Riom offra passa 700 letgs en la parahotellaria. La scola cumplessiva d'antruras – il 1850 quintava Riom anc ina tschuncantina scolars – ha stuì far piazza a classas bassas entaifer il consorzi da scola, al qual Riom è medemamain s'unì, ensemen cun las vischnancas vischinas. Gion Peder Thöni


## Paronz

Anteriura vischnanca politica, circol Surses, district Alvra. Fusiunada il 1979 cun Riom a la vischnanca politica da Riom-Paronz. Paronz sa chatta sin ina terrassa al vest en il Surses. 1156 *Presan*, tudestg Präsenz (fin il 1943). 1850 123 abitants; 1900 113; 1970 81. Il chastè da Rauschenberg, construì probablmain dals *milites* de Reichenberg (menziunads il 1200), è passà pli tard als Deduals ch'eran en il 13avel tschientaner vasals episcopals. Dal chastè, attestà anc il 1617, n'existan oz pli nagins fastizs. Il 1475 è vegnida consecrada la chaplutta da S. Nicola, il 1663 la baselgia barocca, erigida da chaputschins (restaurada il 1969) e munida cun truccas e picturas remartgabl. Ecclesiasticamain ha Paronz appartegnì a Salouf, dal 1641 fin il 1726 a Riom. A Paronz ha era appartegnì la veglia migiuria da Salaschigns cun la chaplutta da S. Baltramieu, menziunada il 1508. Meglieraziun generala 1958–89 (ensemen cun Riom). Il svilup dal center turistic Suagnign a partir dal 1950 ha provocà in spustament dal sectur primar a quel terziar. Paronz furma in consorzi da scola cun Riom dapi il 1969, cun Cunter dapi il 1977. La vischnanca maina ina scolina rumantscha. Gion Peder Thöni



Dapi il 2006 vegnan dadas en il chastè da Riom produczions da l'«Origen Festival Cultural».

FOTO J. MENOLFI



Tavla commemorativa per Benedetg Fontana al chastè da Riom.

## Lexicon Istorico Retic

Il LIR cumpiglia bundant 3100 artigels (geografics, tematics, artigels da familias e biografias) davart l'istorgia grischuna/retica e la Rumantschia. Editura: Fundaziun Lexicon Istorico Svizzer; versiun online: [www.e-lir.ch](http://www.e-lir.ch); versiun stampada: [www.casanova.ch](http://www.casanova.ch) u en mintga libreria.